

पत्रुसकी टिवु यिकी थल्मा

दी थेपकी कोर्ला

दी ति एशिया माइनरकी शारकी थाकाला वोतुप तेरी लुङ्बातिवाला टम्नी देतुप ख्रीष्टियानतिवाला पत्रुसकी टिवु यिकी तड्बु यिन। तिवाला ति “कोन्छ्योककी पेतुप” मीतिवा सिनी सिवी। दी यिकी टिकुप खक्छ्येवु तेन्दोक ति दी यिकी रोकुपतिवाला डाडेड तेरुपला यिन। च्यिलासिसिन ख्रीष्टला तेपा क्यावु तप्की तिवा दुक्पा ताड छेटाडला ख्येल्लोक। तुक क्यानी पत्रुसकी तिवाला डाडेड तेरुप पेला येशू ख्रीष्टकी लेन ल्यामु ताड खो टुङ्नी डोसु लावु ताड खो येलुड फेक्किवी सिनी तिवाला तेन्तेन रेवा बिन वे। दुक्पा ताड छेटाड खुरुप ति तिवी क्यावु तेपा टेड्बु यिन। “ख्रीष्ट फेपुप तुजेला” खोकी तिवाला छ्यक्तक नड्गवी। ती तप्की लोदिमु क्यानी दुक्पा ताड छेटाड खुरिन सिरा हम कि गोकी।

दी यिकी रोकुपतिवाला दुक्पाकी पेला साड डाडेड तेरिन सिरा ख्रीष्टला तेपा क्यावु दोके मिजी क्योड सिनी पत्रुसकी गोड्बा शु वे।

मुला राड वोतुप लोप्च्येनतिवा

- यिकीकी कोर्ला १:१-२
- कोन्छ्योककी नड्गुप थर्वाकी कोर्ला टेन्सो १:३-१२
- मिजी टेड्बु क्योड्गुप कोर्ला टोड्गु १:१३-२:१०
- दुक्पाकी पेला साड कि गोवु ख्रीष्टियानकी लाकातिवा २:११-४:१६
- ख्रीष्टियानकी कुसु ज्यम्बु ताड शब्ज्यी कितुप ५:१-११
- सिन्दा क्यावु ५:१२-१४

पत्रुसकी टसी देलेक

१ टसी देलेक! इ येशूकी लोमा छ्ये पत्रुसकी छ्योक नेसुर पोन्टस ताड गलातिया ताड कापाडोकिया ताड एशिया ताड बिथिनिया लुड्बातिवा नेवा थरा थुरा गल्नी छियग्यपकी मी दोके टम देतुप कोन्छ्योककी पेन नङ्गुप मीतिवाला दी यिकी ति टिवु यिनो। २पपा कोन्छ्योककी थल्माला ख्यिराडला ल्यामो हाक्कोनी पेन नङ्गुसुड, तमा खोकी थु चाङ्मा नेसुर ख्यिराड चाङ्मा च्युङ्गुसुड। तुक क्यानी ख्यिरा येशू ख्रीष्टकी सुडला ड्येन्नी तेपा क्यासिमा खोकी ठक नेसुर चाङ्मा च्युङ्गुसुड।

ख्यिराड तेरीला कोन्छ्योककी कटिन ताड लोदिमु वुड्शी।

सेन्बु लुवु रेवाकी थोक्ला कोन्छ्योकला सोवा देकुप

३दाक्पी चोवो येशू ख्रीष्टकी पपा कोन्छ्योकला सोवा देकिन। च्यिलासिसिन खोकी येशू ख्रीष्टला शेष ने डोसु लाङ्नी खोकी खोरे छासेकी कटिन नेमा दाक्पुला मिजी सम्बा नाङ्गुसुड। तमा दाक्पु शिसिनाड सेन्बु लुवु रेवा ड्येन वे। ४ती तिराड मिन, कोन्छ्योककी खोरे पेन नङ्गुप मीतिवाला थोपुप मोलाम साड नाङ्गुसुड। ती मोलाम ति ना मोडोवु ताड मेटेङ्गु मोडोवु ताड नाम्साड मेसेतुप यिन, तमा ती मोलाम ति

दाक्पुला खोकी ग्येल्खापला टडिक क्यानी वे। ५ख्यिरा कोन्छ्योकला तेपा क्यावु तप्की खोकी ख्यिराडला थर्वा नङ्गुप पर सेक खोकी डार नेसुर ख्यिराडला ज्होक्नी वे। ती थर्वा ति खोकी मी तेरीला ठिम क्या नङ्गुपला फेवु पेला खोकी ख्यिराडला छ्या देन्दुपला टडिक क्या वे। ६तुक क्यानी तन्दा ख्यिराड चेयी पर सेक रङ्गी मिजीला छेटाड बडी वानी सेमला दुक्पा वोसिनाड गा कि गोकिवी। ७ती छेटाड ति ख्यिरा तेपा टेङ्गु वोतुप छ्या देन्दुपला यिन। ख्यिरा क्यावु तेपा ति सेर मे नाङ्गुला ज्हेनी डोमा जोवु सिनाड छासे खक्छ्येवु वोतुप तप्की येशू ख्रीष्ट फेपुप तुजेला ख्यिराडला खोकी ग्येल्खापला सोवा ताड मोवा ताड ताङ्गेन क्या नङ्गुगवी।

८ख्यिरा खोला नाम्साड माथोडिसनाड खोला ड्येङ्गुजे किवी, तन्दा ख्यिरा खोला माथोडिसनाड ख्यिरा खोला तेपा किवी, तमा ख्यिराडला नाम्साड ताम्डे क्या मिसिन्दुप गा ताड किर्मु गिवी। ९च्यिलासिसिन ख्यिरा खोला तेपा क्यावु तप्की खोकी ख्यिराडला दिक्पा ने थर च्यिनी नाम्साड मिशिवु मिजी नङ्गुगवी।

१०ती थर्वाकी थोक्ला कोन्छ्योककी लुङ्गुतेम्बातिवी साड ल्यामो क्यानी हाक्कोवु छाल्सुड। तमा तिवी कोन्छ्योककी ख्यिराडला थर्वा नङ्गुप कटिनकी कोर्ला नमदर शेषुड। ११तिवी ती थर्वा ति नम पेला गिवी,

चुक क्यानी गिवी सिनी हाक्कोवु छाल्सुड। तमा तिवी सेमला वोतुप ख्रीष्टकी थु चाड्मा नेसुर ख्रीष्टकी खुर गोवु छेटाड ताड ती ज्युकला वुङ्गुप मोवाकी थोक्ला गोमाला के पङ्बु छ्या तेन्सुड। १२कोन्छ्योककी लुङ्तेम्बातिवी नमदर शेतुप ताम्डे ति खोप्रे थोक्ला मिन, यिने ख्यिरा थोक्ला यिन। दी ताम्डे ति देवाच्येन नेमा तङ्गुप कोन्छ्योककी थु चाड्मा नेमा ख्यिराडला लेन ल्यामु ख्याप्टाक कितुपतिवी तसाम ख्यिराडला सिक्वावु यिन। ती ताम्डे ति देवाच्येनकी लेन क्योलुप थुतिवी साड छासे ल्हाप गा किवी।

मिजी टेङ्बु क्योङ्गुप कोर्ला

१३तुक क्यानी रङ्गी सेम ति थिला ज्याक्नी डेकला दे। तमा येशू ख्रीष्ट फेवु पेला खोकी ख्यिराडला नङ्गुप कटिन थोपुपला ख्यिराड रेवा की। १४ख्यिराड कोन्छ्योककी कला इयेन्दुप खोकी पुज्युङ्पुमतिवा यिन्दुप तप्की गोमाला कोन्छ्योकला डो माशेवु पेला क्यावु दोके सेम नोजु कितुप क्युर। १५यिने ख्यिराडला कताड नङ्गुप चोवो कोन्छ्योक टेङ्बु वोतुप दोके ख्यिराड साड ख्यिरा मिजीला वोतुप तेरी किताड नालुतिवा टेङ्बु वुड गोकिवी। १६च्यिलासिसिन कोन्छ्योककी सुडला “ड टेङ्बु

वोतुप दोके ख्यिराड साड टेङ्बु वुड गोकिवी।” * सिनी टि वे।

१७तमा सुला साड ख्ये मापेवा क्यानी मीतिवी क्यावु लाका ल्हानी ठिम क्या नङ्गुप कोन्छ्योक ति ख्यिरा पपा सिनी सिक्वावु तप्की दी जम्बुलिङला देतुप पर सेक नरी खोला ज्यिवा खुर्नी मिजी क्योड। १८ख्यिराडला छ्या वे, ख्यिरा पगावा हङ्गावातिवा नेसुर वावु तेर्मेकी किताड नालुतिवा नेसुर ख्यिराड रङ्ज्येन थोप्सुड। ती ति ना डोप सेर ताड डुलतिवा दोके गोड तेनी ख्यिराडला थोपुप मिन, १९यिने काड साड मडी मेतुप ताड चाड्मा वोतुप लुक रुक येशू ख्रीष्टकी गोड छ्येर्मु ठक नेसुर गोड तेनी ख्यिराडला थोपुप यिन। २०कोन्छ्योककी दाक्पुला रङ्ज्येन नङ्गुपला जम्बुलिङ ज्येङ्गुप सिनाड गोमाला के येशू ख्रीष्टला पेन नङ्गुप यिन, यिने तिङ्मी तुजेला ख्यिरा थोक्ला येशू ख्रीष्टला दी जम्बुलिङला तड नङ्गुप यिन। २१खो नेसुर ख्यिरा कोन्छ्योकला तेपा क्या वे। कोन्छ्योककी येशूला टुङ्नी शेषतिवा नेसुर डोसु लड च्यिनी मोवा नाङ्सुड। तुक क्यानी ख्यिरा तेपा ताड रेवा ति कोन्छ्योकला ज्याक्नी वे।

२२त ख्यिराड खोकी सुड टेङ्बुला युनी ख्यिरा मिजी ति टेङ्बु च्युङ्गुप तप्की रङ्गी अच्युनुपतिवाला खोनक्पा माक्यानी ड्यिङ्ज्ये कियी वे, तरोड

साड सेमगी दिड नेज्यु च्यिककी
च्यिकला छासे डियङ्ज्ये की।
२३ख्यिराड ति डोसु वोतुप ताड नरी
लुवु कोन्छ्योककी सुड नेसुर मिजी
सम्बा ड्येतुप यिनो। खोकी सुड ति
ना डोप मिन, यिने नाम्साड ना मोडोवु
यिन। २४तुक क्यानी कोन्छ्योककी
सुडला दुक सिनी टि वे,

“तेरी मीतिवा च दोके यिन,
मीतिवा चोछ्ये वोसिनाड तिवा
ति चे मेन्दोक दोके यिन।

च रेर्पा गलिसमा मेन्दोक
डियलिंगी,

२५यिने कोन्छ्योककी सुड ति
नरीकी नरी लुकिवी।”*

ख्यिराडला ख्याप्टाक क्यावु सुड
ति दी राड यिनो।

कोन्छ्योककी पेन नङ्गुप गिपातिवा

२ तुक क्यानी ख्यिराड लाका
दुक्टा कितुप ताड जिनोक जोप
ताड खोनक्पु कितुप ताड ठतोक डर्केल
कितुप ताड मीला मारे तोङ्गुप ताम्डे
तेरी क्युर। २-३ख्यिरा कोन्छ्योक
च्यङ्च्यु सम्बा वे* सिरुप ति हाक्कोसुड
सिसिन मलोक क्येवु आडातिवा वोमा
छलुप दोके ख्यिराड टेङ्बु ताड चाङ्मा
वोतुप कोन्छ्योककी सुडला युक्पु
छासे नो की। तुक क्यासिन ख्यिराडला
मड मड दिक्पा ने थर्वा ड्येकिवी।

४ख्यिराड चोवो येशूकी चिप्ला
शोक। खो ति खाङ्बा जोप मीतिवी
फेन मोथोवु यिन सिनी तेन्नी क्युरुप
दो यिन, यिन्सिनाड कोन्छ्योककी
ती दो ति पेनी मीतिवी थोक्ला
मिजी नङ्गुप गोड छ्येन्बु वोतुप
दो जो नाङ्सुड। ५ख्यिराड साड
कोन्छ्योककी मिजी नङ्गुप दो दोके
यिन। खोकी ती दोतिवा दुम्नी खोरे थु
चाङ्माकी ल्हडाड जो नङ्गिवी। तुक
क्यानी ख्यिराड ति येशू ख्रीष्ट नेसुर
सेम टेङ्बु क्यानी कोन्छ्योकला गा
लङ्गुप जिन्बा बुलुप चाङ्मा वोतुप
कोङ्यारतिवा यिनो। ६च्यिलासिसिन
कोन्छ्योककी सुडला दुक सिनी टि
वे,

“ल्होसा, ड सियोनला डे पेतुप
गोड नावु सुरकी दो दोके
यिन्दुप मिरा च्यिक ज्योकिनो।
सी खोला तेपा किवे,
तिवा नाम्साड डोछाला
मेख्येल्वी।”*

७तुक क्यानी ख्यिराड सी खोला
तेपा किवे, तीकी थोक्ला खो गोड
नावु वे, यिने तेपा मिकिवुतिवी थोक्ला
ति कोन्छ्योककी सुडला साड दुक
सिनी टि वे,

“ती दो ति खाङ्बा जोप मीतिवी
फेन मोथोवु सिनी क्युर वे,
यिन्सिनाड ती ति सुरकी दो
च्युङ्गिवी।”*

“तमा यम्बा सुडला दुक सिनी टि वे,
 “दो च्यिककी मीतिवाला नर्तुक
 ग्यक ज्यिकिवी,
 तमा टक च्यिककी मीतिवाला
 तला ग्यक ज्यिकिवी।”*

ती दोके क्यानी मीतिवा तला
 ग्यकिवी, च्यिलासिसिन तिवी
 कोन्छ्योककी सुड माड्येन्दुप तप्की
 यिन। तिवी थोक्ला तुकै च्युङ्गुप ति
 कोन्छ्योककी गोमाला राड सुङ्गुप
 सुङ्गी मुला डिकिवी।

९यिने ख्यिराड याड तुकै मिन,
 ख्यिराड ति कोन्छ्योककी पेन
 नङ्गुप गिपा ताड खोकी ग्येल्खापकी
 कोङ्यार ताड टेड्बु वोतुप मिरिक
 ताड कोन्छ्योककी खोरे मीतिवा यिन।
 खोकी ख्यिराडला नक्तोमी ने थेन्नी
 खोकी हलेवु वोसिरला टिन फेप्सुड।
 तुक क्यानी ख्यिरा खोकी हलेवु
 लाकातिवा मी यम्बाला ख्याण्टाक
 कि थुप्शी। १०गोमाला ख्यिराड सी
 गिपा साड मिनोक, यिने त याड
 ख्यिराड खोकी गिपा च्युड वे।
 गोमाला याड ख्यिराडला खोकी
 च्यम्बा माथोप वे, यिने त याड
 ख्यिराडला खोकी च्यम्बा थोप्नी वे।

कोन्छ्योककी थोक्ला योक्पु दोके
 च्युङ्गुप कोर्ला

११ तुक क्यानी ड्यिङ्ज्येवु
 अच्युनुपतिवा, ड ख्यिराडला गोड्बा

शोयी। दी जम्बुलिडला दाक्पु ति
 ड्यिमा चेयी पर सेक तिराड देतुप
 छ्यियग्यपकी मी ताड टम्नी देतुप मी
 दोके यिन सिरुप हाक्कोनी ख्यिरा
 सेमगी तेन्दोकला लङ्गुप जुकी
 नासाम दुक्टा नेसुर कुतुक दे। १२यिने
 मिरिक यम्बाकी मीतिवी पर्ला ख्यिरा
 किताड नालु ति ल्यामु बुड गोकिवी।
 सी ख्यिराडला मेलोवा सिनी ख्यिरा
 तेन्दोकला लासिनाड ख्यिरा लाका
 ल्यामु क्यावु ति थोङ्नी कोन्छ्योक
 फेवु तुजेला तिवी साड खोला सोवा
 देक्शी।

१३ख्यिराड तेपा कितुप मी यिन्दुप
 तप्की चोछ्येवु ग्येल्बु यिन्शी,
 ग्येल्वी ओडला देनी लुङ्बाला ग्येला
 कितुप मी छ्येतिवा यिन्शी, चोवो
 कोन्छ्योककी थोक्ला जम्बुलिडला
 वोतुप तेरी ओङ्ज्येन कितुपतिवी
 ओडला दे। १४ती मी छ्येतिवा
 ति लाका दुक्टा कितुपतिवाला
 छ्येर्पा तेरुपला ताड लाका ल्यामु
 कितुपतिवाला ताड्देन कितुपला
 ग्येल्बुकी पेतुप मीतिवा यिन।
 १५च्यिलासिसिन कोन्छ्योककी
 नोवा ति ख्यिरा लाका ल्यामु क्यानी
 ख्यिरा तेन्दोकला लानी ताम्डे मेलोवा
 कितुप मी अम्बारडिशडतिवाला
 खरक्पा देतुप जोप यिन। १६ख्यिराड
 ति दिक्पी ओड नेमा रङ्ज्येन थोप्नी
 वे, तुक क्यानी रङ्ज्येन वोतुप

मीतिवा दोके मिजी क्योड। रड्ज्येन थोपुप तप्की ख्यिराड ति काड लाका मेलोवा क्यासिनाड गिवी सिनी नासाम मातोड, यिने कोन्छ्योकला शब्ज्यी कितुप योक्पु दोके च्युड्नी मिजी क्योड। १७मी तेरीला ताड्देन की, तेपा कितुप अच्युनुपतिवाला ड्रियड्ज्ये की, कोन्छ्योककी थोक्ला ज्यिवा की, चोछ्येवु ग्येल्वुला ताड्देन की।

ख्रीष्टकी दोके छेटाड खुरुप कोर्ला

१८ख्यिराड योक्पुतिवा यिन्सिन, रडगी ज्यिन्दाकतिवाला ताड्देन क्यानी तिवा ओडला दे। ख्यिराडला ल्यामु कितुप ताड च्यड्च्यु कितुप ज्यिन्दाकतिवाला तिराड मिन, यिने ख्यिराडला दुक्टा कितुप ज्यिन्दाकतिवा ओडला साड दे। १९चुका मी तीकी खोरो काड लाका मेलोवा माक्यासिनाड ज्यिन्दाककी छेटाड बिन्दुप पेला कोन्छ्योकला नासाम ताड्नी हम क्या देकिवे, ती मी तीला कोन्छ्योककी गा किवी। २०दोजो ख्यिरा लाका दुक्टा क्यावु तप्की ख्यिराडला मी दुसिनाड हम क्यानी देसिन ख्येप्साड गिवी सिसिन, ख्यिरा लाका ल्यामु क्यानी दुक्पा खुरुप पेला हम क्या देकिवी सिसिन कोन्छ्योककी ख्यिराडला गा किवी। २१च्यिलासिसिन खोकी

ख्यिराडला तीकी थोक्ला कताड नड्गुप यिन। ख्रीष्टकी साड छेटाड खुर्नी ख्यिरा थोक्ला पड्बु च्युड्सुड। ती तप्की ख्यिराड साड खोकी क्या नड्गुप दोके क्यानी मिजी क्योड गोकिवी। २२खोकी काड साड दिक्पा माक्या, खोकी ख नेमा जिनोक जोप ताम्डे साड माथेन।* २३मीतिवा खोला मारे तोड्गुप पेला खोकी तिवाला छ्याक मालोक। दुक्पा तेरुप पेला तिवाला काड ताम्डे मेलोवा मासुड। यिने तुजे छेसिमा कोन्छ्योककी राड ठिम टेड्बु क्या नड्गिवा सिनी खोला रेवा क्यासुड। २४तमा दाक्पी दिक्पातिवा तेरी क्युर्नी कोन्छ्योककी थोड्दाडला टेड्बु वोतुप मिजी क्योड्शी सिनी दाक्पी दिक्पा खोकी जुला खुर्नी ग्यडिशडला टुड्सुड। खोकी जुला म थेन्दुप तप्की ख्यिरा नेजु टेक्सुड। २५च्यिलासिसिन तोड्ला ख्यिराड ख्यम्नी गलुप लुकतिवा दोके यिन, यिने त याड ख्यिरा सेम ल्हाटे कितुप गोठाला दोके यिन्दुप ताड ख्यिराडला ज्होकुप येशू ख्रीष्टकी ते ख्यिराड लोकनी वा वे।

ख्योवा ताड पेर्मीकी कोर्ला

३ तुक राड क्यानी पेर्मीतिवा रडगी ख्योवी ओडला दे। तुक क्यासिन कोन्छ्योककी सुडला

मेङ्गेन्तुप ख्योवा साड पेर्मीकी किताड नालु ल्यामु वोतुप थोङ्सिमा कोन्छ्योककी कोर्ला काड मालाप्सिनाड ख्योवी सेम साड कोन्छ्योककी थाकाला ग्युर्किवी।
 २ च्यिलासिसिन ख्यिरा मिजी टेङ्बु वोतुप ताड ख्यिरा तिवाला ताङ्देन क्यावु ति तिवी थोङ्गिगी। ३ तुक क्यानी ख्यिराड ज्ह शेनी सेरकी क्याङ्गेन तानी मज्या ल्यामु कोन्नी फिला तिराड छ्यावु दोके जेमु जोप मिन, ४ यिने ख्यिरा सेमगी दिङ्गला ति नाम्साड मोफोवु कुसु ज्यम्बु ताड हम क्या देतुप च्युङ्नी मज्या ल्यामु कोन्नी छ्यावु दोके जेमु जो। ती ति कोन्छ्योककी थोङ्गदाडला छासे गोड नावु वे। ५ च्यिलासिसिन तोङ्गला कोन्छ्योकला रेवा कितुप आमपुम टेङ्बुतिवी साड तुक राड क्यानी खोरो ख्योवी ओडला देसुड। ६ साराकी साड खोरो ख्योवा अब्राहामला चोवो सिनी ख्योवी सिक्खावु ताम्डेला ड्येन्सुड। दोजो ख्यिरा साड तुक राड क्यानी काङ्गी थोक्ला साड ज्यिवा माक्यानी लाका टेङ्बु तिराड क्यासिन ख्यिराड साड सारा दोके यिनो।

७ तुक राड क्यानी ख्योवातिवी साड रङ्गी पेर्मी ति रम्बु मेतुप यिन सिमाक्यानी तिवाला ताङ्देन क्यानी मुला राड मिजी क्याङ्ग, च्यिलासिसिन ख्योवा ताड पेर्मी ति कोन्छ्योककी कटिन नङ्गुप मिजी मुला राड

क्योङ्गुपला जो नङ्गुप यिन। तुक क्यासिन ख्यिराड मोपोर कितुप पेला ख्यिराडला कले मेङ्गशी।

लाका टेङ्बुकी थोक्ला छेटाड वुङ्गुप कोर्ला

८ तेरी सिनाड तिङ्गला ड काड सिरिन सिसिन, ख्यिराड सेम च्यिक्पा राड च्युङ्गुप ताड च्यिक्की च्यिक्ला दुक्पाला ख्येलुप पेला डाडेड तेरुप ताड ड्यिङ्ग्ये कितुप ताड च्यम्बा कितुप ताड छ्येजु मिकिवु वुड गोकिवी। ९ ख्यिराडला मेलोक्पा कितुपतिवाला मेलोक्पा माकी, याङ्ना मारे तोङ्गुपतिवाला ड्येन मालाड, यिने तिवाला मोलाम बिन। च्यिलासिसिन तीकी थोक्ला राड कोन्छ्योककी ख्यिराडला पेन नङ्गुप यिन। तुक क्यासिन खोकी ख्यिराडला मोलाम नङ्गिगी। १० च्यिलासिसिन कोन्छ्योककी सुडला दुक सिनी टि वे,

“चुका मी तीकी रङ्गी मिजीला
गा कितुप ताड लोदिमु
छोलुप नोकिवे,
तीकी खोरो ख नेमा ताम्डे
मेलोक्पा मलाप्शी,
तमा जिनोक जोप ताम्डे साड
मिकिशी,

११ तमा मेलोक्पा कितुप नेसुर
लोकनी लाका ल्यामु किशी,
तमा लोदिमु छल्नी ती लोदिमुकी
तिङ्गला तिङ्ग्योक्शी।

१२ च्यिलासिसिन चोवोकी सुडला
 युकुपतिवाला खोकी शाल
 जिक्विी,
 तमा तिवी क्यावु मोपोर साड
 ड्येन्गिी।
 यिने कोन्छ्योककी सुडला
 मुयुकुपतिवाला ति खोकी
 शाल मिजिी।”*

१३ दोजो ख्यिरा मीतिवी थोक्ला
 लाका ल्यामु कितुपला छासे नो
 क्यासिन सी ख्यिराडला मेलोकपा
 किवी रो? १४ यिने ख्यिराड लाका
 टेड्बुकी थोक्ला दुक्पा खुर्सुड सिसिन
 ख्यिराडला मोलाम थोपुप यिनो।
 मीतिवी ख्यिराडला ज्यिवा कुसिन
 ख्यिराड ज्यिवा माकी, यर्मिन मर्मिन
 साड माडो। १५ यिने येशू ख्रीष्टला
 चोवो सिनी सेमगी दिड नेज्यु मोवा
 की। तमा ख्यिरा क्यावु रेवाकी कोर्ला
 ललाइकी ख्यिराडला टिसिन तीकी
 टिलेन तेरुपला नरी टडिक क्यानी
 दे। यिने ख्यिराड कुसु ज्यम्बु कितुप
 ताड ताड्देन क्यानी किसा। १६ तमा
 ख्यिराड सेम टेड्बु क्यानी दे, तुक
 क्यासिन ख्यिरा ख्रीष्टला ताड्देन
 क्यानी क्यावु लाकाकी तेन्दोकला
 लड्गुपतिवा तिवी क्यावु लाका
 मेलोवाकी थोक्ला डोछा लड्शी।
 १७ दोजो कोन्छ्योककी नोवा तुकै राड
 यिन्सिन लाका मेलोकपा क्यानी दुक्पा
 खुरुप सिनाड लाका ल्यामु क्यावु

तप्की दुक्पा खुरुप ति मड ल्यामु यिन।
 १८ च्यिलासिसिन चोवो येशू ख्रीष्ट
 साड दिक्पातिवी तेन्दोकला थेड्मा
 च्यिक टुड्सुड, खो दिक्पा मेसिनाड
 मेटेड्बुतिवाला कोन्छ्योककी मुला
 तम्जी ल्यामु जोपला टुड्गुप यिन।
 खोकी जु ति टुड सिनाड खोकी थु
 ति कोन्छ्योककी डोसु लाड्सुड।
 १९ खोकी थु ति ड्येलाला शोरुप
 नम्शिडतिवाला फेप्नी कोन्छ्योककी
 सुड ख्याप्टाक क्या नाड्सुड। २० ती
 नम्शिडतिवी थल्माला नोआकी टु जोप
 पेला कोन्छ्योककी कला माड्येन,
 यिन्सिनाड कोन्छ्योककी तिवी
 थोक्ला हम क्यानी गुसुड। तमा ती
 टी नाड्ला शुवु मी मिरा ग्ये तिराड छ्यु
 नेसुर ज्होकसुड। २१ ती छ्यु ति तन्दा
 ख्यिराडला साड ज्होकुप बप्तिस्माकी
 थोक्ला गोमाला के छ्या तेन्दुप त
 यिन। ती बप्तिस्मा ति जुकी टेमा
 शलुप मिन, यिने ख्यिरा सेम टेड्बुकी
 कोन्छ्योक ताड मुला थाक्छ्येतुप त
 यिन। च्यिलासिसिन कोन्छ्योककी
 येशू ख्रीष्टला टुड्गुप नेसुर डोसु
 लाड्नी ख्यिराडला शेप ने थर
 च्यिसुड। २२ खो देवाच्येनला फेप्सुड,
 तमा देवाच्येनकी लेन क्योलुप थुतिवा
 ताड ओड्ज्येन कितुपतिवा ताड
 डारतिवाला खोरे ओडला ज्याक्नी
 खो ति कोन्छ्योककी यावी थाकाला
 वोतुप ठीला ज्युसुड।

कोन्छ्योककी थोकला मिजी क्योङ्गुप

४ चुक क्यानी ख्रीष्टकी खोरे जुला दुक्पा खुर नाङ्सुड, ख्यिरा साड खोकी दोके क्यानी दुक्पा खुरुपला टडिक क्यानी दे। च्यिलासिसिन सी ख्रीष्टकी थोकला जुला दुक्पा खुर्किवे, तीकी दिक्पा कितुप क्युर्किवी। २तमा तीकी खोरो मिजी वोता सेक दुक्टा कितुप नोवाला मिन, यिने कोन्छ्योककी नोवाला मिजी क्योङ्गिगी। ३तोङ्ला याड ख्यिराड साड यहूदी मिन्दुप मिरिक यम्बाकी मीतिवा दोके दुक्टा कितुप ताड नासाम मेलोकपा तोङ्गुप ताड छ्याङ्गेले कितुप ताड ड्याम तोङ्गुप ताड सज्युरे कितुप ताड कुतिवाला तेन्नी डोछा लङ्गुप लाका क्यानी बडी लाताक च्यक्सुड। ४यिने त याड ख्यिराड तुका सेम नोजु कितुप लाका ति तिवी मुला च्यक्पा राड क्यानी मिकिवु ल्हानी कोन्छ्योकला डो मेशेवु मीतिवा हलेवा लानी ख्यिराडला मारे तोङ्गिगी। ५यिने सेन्बु वोतुप ताड शेषतिवाला ठिम क्या नङ्गुप कोन्छ्योकला तिवी क्यावु लाकाकी ची ति तिवी ते राड गोकिगी। ६ती तप्की शेषतिवाला साड लेन ल्यामु ख्याप्टाक क्यावु यिन। तुक क्यानी तिवा दी जम्बुलिङला देतुप पेला तिवी क्यावु लाकाकी थोकला ठिम फोक्सिनाड नम्शिड ति कोन्छ्योक ताड मुला देकिगी।

७दी जम्बुलिङकी तिङ्मी तुजे वुङ्गियन वे। तुक क्यानी ख्यिराड मोपोर ल्यामु कितुपला सेम थिला ज्याकनी च्याङ्से देता। ८ख्यिराड तेरी सिनाड मड च्यककी च्यकला नरी ड्यिङ्ज्ये की। च्यिलासिसिन ड्यिङ्ज्येकी राड दिक्पातिवा बडी ताकिवी। ९ख्यिराड ख्यिरा खाङ्बाला वुङ्गुप डेन्बुतिवाला मुक्तम मातेन्नी च्यककी च्यकला ताङ्देन किसा। १०ख्यिराड सुला कोन्छ्योक नेमा मीतिवाला शब्ज्यी कितुपला ओड थोप्वे, ती ओड थोपुप दोके क्यानी च्यककी च्यकला शब्ज्यी की। ११सी कोन्छ्योककी सुड ख्याप्टाक किवे, तीकी कोन्छ्योक नेमा थोपुप ओड नेसुर राड ख्याप्टाक की। सी शब्ज्यी किवे, तीकी कोन्छ्योक नेमा वावु ओड नेमा शब्ज्यी की। तमा ख्यिरा क्यावु तेरी लाका नेसुर येशू ख्रीष्टकी छ्योक ने कोन्छ्योकला सोवा वुङ्शी। तमा तेरी मोवा ताड ओड ति नाम्साड मोतोरुप तुजे सेक कोन्छ्योकला वुङ्शी, आमिन।

कोन्छ्योकला तेपा क्यावु थोकला दुक्पा खुरुप

१२ ड्यिङ्ज्येवु अच्युनुपतिवा, ख्यिराडला तेपा रम्बु जोपला छासे खोकपा ल्हाप छेटाडतिवा ख्येलुप पेला ख्यिराड मिच्यक्पा च्युङ्सुड सिनी हलेवा माकी, १३यिने ख्यिराड ख्रीष्टकी थोकला छेटाड खुरुपतिवा

यिन्दुप तप्की ती पेला गा की। तुक क्यासिन खोकी मोवा छ्या देन्दुप पेला ख्यिराडला मड लोदिमु ताड गा लडिगवी। १४दोजो ख्रीष्टला तेपा क्यावु तप्की मीतिवी ख्यिराडला डियड्मर क्यासिन ख्यिराडला मोलाम थोपुप यिनो, च्यिलासिसिन कोन्छ्योककी मोवा वोतुप थु चाड्मा ति ख्यिरा मुला ज्यु वे। १५यिने ख्यिराड सु साड मी सेतुप ताड कुन कितुप ताड दुक्टा कितुप ताड मी यम्बी लाकाला लाक्पा ग्यप्नी छेटाड माखुर। १६यिन्सिनाड ख्यिराड येशूला तेपा क्यावु तप्की दुक्पा खुर्किवी सिसिन ख्यिराड डोछा माकी, यिने कोन्छ्योकला राड सोवा तेक। १७च्यिलासिसिन कोन्छ्योककी खोरे मीतिवाला ठिम क्या नड्गुप तुजे गो जुवु पेला लेप्नी वे। खोकी सुडला ड्येन्दुपतिवाला साड खोकी ठिम क्या नडिगवी सिसिन खोकी सुडला तेपा मिकिवुतिवाला याड चुका पर्च्या मड्मु के फोकिताड? १८तमा कोन्छ्योककी सुडला साड दुक सिनी टि वे,

“दोजो कोन्छ्योककी सुडला युकुप मीतिवाला साड दिक्पा ने थरुपला कले वोसिन टेड्बु मेतुपतिवाला याड चुकै के डि ताड?”*

१९तुक क्यानी कोन्छ्योककी नोवाला वोतुप दोके दुक्पा खुरुप मीतिवी लाका ल्यामु क्यानी खोप्रे

सेम ति खोड्तेर्मु वोतुप कोन्छ्योकला चेक ते गोकिवी।

चर्चकी गोमा कितुपतिवा ताड नाज्युडतिवाला

५ तमा ख्यिराड चर्चकी मीतिवी पर्ला गोमा कितुपतिवाला ड गोड्बा शोयी। ड साड चर्चकी गोमा कितुप मी यिन, तमा ख्रीष्टकी छेटाड खुरुप थोकला साड पड्बु तेरुप मी यिन। ज्युकला ख्रीष्टकी मोवा छ्या देन्दुप पेला ख्यिरा मुला राड डला साड ती मोवा ति थोष्किवी। २ख्यिराडला चेक तेन ज्युकुप कोन्छ्योककी पेतुप मीतिवाला लुक गोठालाकी लुकतिवाला ल्हावु दोके क्यानी ल्यामु ल्हटे किसा। कर्खापला ख्येलनी कितुप मिन, यिने कोन्छ्योककी नोवा यिन सिनी सेम्बा सेमगी किसा। टड्गा डेवी देर्पाला ख्येलनी मिन, यिने गा क्यानी किसा। ३ख्यिराडला चेक तेन ज्युकुप मीतिवाला ओड्ज्येन क्यानी मिन, यिने ख्यिरा मिजी ति तिवी थोकला पड्बु च्युड गोकितो। ४तमा लुक गोठाला छ्ये दोके यिन्दुप ख्रीष्ट फेपुप पेला ख्यिराडला नाम्साड मेसेतुप मोवा वोतुप ग्येल्वुकी उशाक थोष्कितो।

५तमा नाज्युडतिवा, गावागुवातिवी ओडला देता। च्यिक ताड च्यिककी ओडला देनी छ्येजु मिकिवु वुड गोकितो। च्यिलासिसिन “छ्येजु

कितुप मीतिवाला कोन्छ्योककी गा मलाङ्गिगी, यिने छ्येजु मिकिवु मीतिवाला खोकी कटिन नङ्गिगी।”^९ सिनी कोन्छ्योककी सुडला साड टि वे।^{१०} ती तप्की चोछ्येवु कोन्छ्योककी ओडला देनी खुरुङ् छ्येजु मिकिवु वुड गोकिवी। तमा खोकी नोक्यावु तुजेला ख्यिराडला छ्ये जो नङ्गिगी।^{११} ख्यिराडला चुका पपतिवा वोसिनाड खोला चेक ते, तमा खोकी ख्यिराडला ल्हटे क्या नङ्गिगी।

^{१२} च्याङ्से देता, ड्यी मालोकनी देता! च्यिलासिसिन ख्यिरा ड शैतान ति सुला थेक्किवे, तीला साप सिनी वोरुप सेङ्गी दोके वोरिन वोतो।^{१३} तुक क्यानी ख्यिराड तेपा रम्बु क्यानी तीकी तेन्दोकला लोसा, च्यिलासिसिन जम्बुलिङ तेरीला वोतुप ख्यिरा अच्युनुपतिवी साड तुकै राड छेटाड खुरिन वोतो।^{१४} कोन्छ्योक ति ख्यिराडला तेरी कटिन नङ्गुप कोन्छ्योक यिन। खोकी येशू ख्रीष्ट ताड मुला नाम्साड ना मोडोवु मोवाला ख्यिराडला कताड नड वे। तमा चेयी पर सेक ति ख्यिरा छेटाड

खुर्सिनाड खोकी ख्यिरा क्यावु दुक्पा नेसुर ख्यिराडला छ्ये जो नङ्गिगी। तमा ख्यिराडला फार छुर मोयोम्बुप ताड डार छ्येवु जोनी ख्यिरा तेपा ति डम्ज्यी रम्बु तिङ्गुप दोके जो नङ्गिगी।^{१५} खोला राड ओड ताड डार ति नरीकी नरी वुङ्शी। आमिन।

पत्रुसकी तिङ्माला टसी देलोक सिक्वावु

^{१२} दी यिकी ति खोङ्तेर्मु वोतुप डे नुप सिलासला टिक च्यितुप यिनो। दी यिकी ति ख्यिराडला टोङ्गु तेरुपला ताड कोन्छ्योककी कटिन टेङ्बु ति दी राड यिन सिनी पङ्बु तेरुपला टिवु यिनो। तुक क्यानी ख्यिराड दी कटिनला ल्यामो क्यानी देता।^{१३} बेबिलोनकी चर्चला वोतुप कोन्छ्योककी पेन नङ्गुप तेपा कितुपतिवा ताड डे पुज्युड दोके राड यिन्दुप मर्कूसकी साड ख्यिराडला टसी देलेक सिनी ताड वोतो।^{१४} ख्यिराड च्यिककी च्यिकला ड्यिङ्ज्ये क्यानी टसी देलेक सिसा।

ख्रीष्ट येशूला तेपा कितुपतिवा तेरीला लोदिमु वुङ्शी।

